



OPĆINSKO VIJEĆE

Broj: 02-1-02-753/21

Datum: 22.06.2021. godine

Na osnovu člana 2.12 stav (5) i 2.14 Izbornog zakona BiH („Službeni glasnik BiH“, broj: 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24, 06, 32/07, 33/08, 37/08, 32/10, 18/13, 7/14, 31/16, i 41/20), Uputstva o utvrđivanju kvalifikacija, broja i imenovanju i razrješenju i obuci članova Izborne komisije osnovne izborne jedinice u Bosni i Hercegovini („Službeni glasnik BiH“, broj: 29/18 i 39/19), i člana 19. Statuta Općine Foča („Službene novine Bosansko-podrinjskog kantona“, broj 8/08, 11/08, 16/13, i 07/20), Općinsko vijeće Foča, na sjednici održanoj dana 17.06.2021. godine d o n o s i

ODLUKU

o objavljivanju Javnog oglasa za imenovanje dva člana Općinske izborne komisije Foča (FBiH)

Član 1.

Ovom Odlukom utvrđuje se raspisivanje Javnog oglasa, postupak i kriteriji za imenovanje dva člana Općinske izborne komisije Foča (FBiH).

Sastavni dio ove Odluke je tekst javnog oglasa za imenovanje dva člana Općinske izborne komisije.

Član 2.

Dva člana Općinske izborne komisije će imenovati Općinsko vijeće uz saglasnost Centralne izborne komisije BiH na mandatni period od 7 (sedam) godine.

Član 3.

U skladu sa Izbornim zakonom BiH i Uputstvom o utvrđivanju kvalifikacija, broja i imenovanju i razrješenju i obuci članova Izborne komisije osnovne izborne jedinice u Bosni i Hercegovini, kandidati za člana Općinske izborne komisije moraju ispunjavati opće uslove:

1. da je osoba sa pravom glasa,
2. da je osoba sa odgovarajućom stručnom spremom.

Član 4.

(1) Pored općih uslova iz prethodnog člana, osoba koja je kandidat za člana općinske izborne komisije Foča (FBiH) mora ispunjavati i slijedeće posebne uslove:

1. da ima prebivalište na području općine Foča (FBiH);
2. da ima završen fakultet, VII/1 stepen stručne spreme ili završen fakultet Bolonjskog sistema studiranja sa najmanje 180 ETSC i
3. da posjeduje iskustvo u provedenju izbora.

(2) Pod iskustvom u provedenju izbora podrazumijeva se:

1. članstvo u izbornoj komisiji i
2. članstvo u biračkom odboru na izborima obuhvaćenim Izbornim zakonom BiH.

(3) Izuzetno od odredbi tačke (1) alineja 1. član izborne komisije može biti osoba sa prebivalištem iz druge općine, ukoliko nema kandidata sa prebivalištem u općini Foča (FBiH) koji ispunjavaju uslove tražene javnim oglasom.

(4) Izuzetno od odredbi tačke (1) alineja 3, član izborne komisije može biti osoba koja ima VII/1 stepen stručne spreme, završen pravni fakultet, odnosno završen pravni fakultet Bolonjskog sistema studiranja sa najmanje 180 ETSC, bez izbornog iskustva navedenog u tački (2).

(5) Izuzetno od odredbi tačke (1) alineja 2, član izborne komisije može biti osoba koja ima završenu višu školu, odnosno VI stepen stručne spreme, ukoliko je potrebno ispoštovati odredbe člana 2.14 stav (1) Izbornog zakona BiH.

(6) Izuzetno, ukoliko ni u ponovljenom postupku raspisivanja javnog oglasa nema kandidata koji ispunjavaju uslove iz tačke (1) alineja 2, član izborne komisije može biti osoba koja ima završenu srednju školu, odnosno IV stepen stručne spreme.

Član 5.

(1) Sastav Općinske izborne komisije je multietničan tako da odražava zastupljenost konstitutivnih naroda uključujući i ostale vodeći računa o posljednjem popisu stanovništva provedenom na državnom nivou.

(2) U sastavu Općinske izborne komisije, nastojat će se obezbijediti ravnopravna zastupljenost spolova u skladu sa Zakonom o ravnopravnosti spolova u BiH.

Član 6.

U skladu sa članom 2.3 Izbornog zakona BiH, za člana izborne komisije ne može biti imenovana osoba:

- koja se ne može kandidovati u smislu odredbi člana 1.6, 1.7 i 1.7a Poglavlje I Izbornog zakona BiH;
- koja je član najvišeg izvršno-političkog organa političke stranke ili koalicije (predsjednik, potpredsjednik, generalni sekretar, sekretar ili član izvršnog odbora ili glavnog odbora);
- koja je nosilac izabranog mandata ili je član izvršnog organa vlasti, osim u slučajevima predviđenim članom 2.12 stav (4) Izbornog zakona BiH;
- koja je kandidat za izbore za bilo koji nivo vlasti u Bosni i Hercegovini;
- kojoj je izrečena kazna za težu povredu Izbornog zakona BiH ili propisa za koji je lično odgovorna, u posljednje četiri godine računajući od dana pravosnažnosti odluke.

Član 7.

Član Općinske izborne komisije ne može biti zastupnik, odnosno punomoćnik političkog subjekta koji učestvuje na izborima, niti lice koje je pravosnažnom sudskom presudom osuđeno na kaznu zatvora u trajanju od šest mjeseci i duže (član 2.12 stav (7) Izbornog zakona BiH).

Član Općinske izborne komisije ne može biti osoba koja obavlja izvršnu funkciju, kako je utvrđeno odredbom člana 1.8 stav (6) Izbornog zakona BiH, odnosno osoba koju je na dužnost imenovalo Vijeće ministara BiH Vlada Federacije BiH, Vlada Republike Srpske, kantonalna vlada i općinsko vijeće, odnosno skupština općine.

Član 8.

Postupak po objavljenom Javnom oglasu provest će Komisija za izbor i imenovanja Općinskog vijeća Foča koju čine: Predsjednik Rusmira Delić, zamjenik predsjednika Aida Subašić i član Suvad Dedović.

Komisija je dužna obaviti poslove utvrđene Uputstvom: provesti postupak oglašavanja, podnijeti pisani izvještaj Općinskom vijeću koji sadrži sve relevantne podatke za svakog kandidata koji je podnio zahtjev po javnom oglasu. U navedenom izvještaju komisija vrši klasifikaciju kandidata na one koji ispunjavaju uslove tražene javnim oglasom i na one koji ne ispunjavaju uslove, uz obrazloženje. Sa kandidatima koji ispunjavaju uslove javnog oglasa komisija obavlja intervju, prema prethodno utvrđenim kriterijima, nakon čega vrši bodovanje i sačinjava rang listu sa redoslijedom kandidata prema uspjehu (ukupnom broju bodova) postignutom na intervjuu i istu dostavlja Općinskom vijeću.

Općinsko vijeće, cijeneći položaj kandidata na rang listi donosi odluku o imenovanju dva člana Općinske izborne komisije.

Član 9.

Javno oglašavanje će se izvršiti saglasno članu 7. i 8. Uputstva, na način da će se objaviti Javni oglas u dnevnim novinama „Oslobođenje“, na oglasnoj ploči i na web stranici Općine Foča (FBiH).
Javni oglas iz stava 1. ovog člana ostaje otvoren 8 (osam) dana od dana objavljivanja.

Član 10.

Za stručnu i tehničku podršku Komisiji zadužuje se Stručna služba Općinskog vijeća.

Član 11.

Ova Odluka stupa na snagu danom donošenja, a naknadno će biti objavljena u Službenim novinama Bosansko-podrinjskog kantona.

